

Victima cu wowo yen lagrima a splica Hues con homber a maltrat'e dilanti su yiunan

ORANJESTAD (AAN): Den Corte di Husticia ta trata casonan di problema familiar y tin biaha esakinan ta hopi fastioso door cu hopi biaha e homber ta maltrata su pareha formal.

Corte di Husticia a trata e caso penal cu Ministerio Publico a cuminsa contra e homber G.H. acusa cu intencionalmente el a dal su pareha C., riba 27 December 2015 varios biaha cu mokete. Tambe e ta worde acusa cu dia 16 Maart 2016, el a horta un camisa den un tienda.

SOSPECHOSO NO A PRESENTA:

Dos abogado mr. Zara y mr. Bryson a presenta pero no e sospechoso. Hues a bisa cu tin un raport di Reclasering. E dama victima, C., a presenta den Corte y a bisa Hues cu ta promer biaha cu e ta haya su mes den algo asina pero no sa di nada. Hues a puntr'e si e ta bay haci demanda di daño. El a bisa cu e tin relato di dentista pa drecha su djen-tenan. Tambe e mester a cambia slotnan di cas y instala alarma. Esaki pasobra e sospechoso tabata keda molesti'e. Hues a conta tur cos. El a bisa e victima tambe cu no por spera mucho cos di e sospechoso kende ta biba riba caya.

Hues a bisa cu e victima C. a haci denuncia di maltrato contra G.H. E acusado G.H. a worde interroga y el a bisa cu e no ta corda nada. El a admiti si di a horta e camisa for di un tienda.

Abogado mr. Bryson a bisa cu e problema di G.H. ta alcohol. Ora e no ta bebe e ta un bon persona. E raport di Reclasering ta duna un imagen di e persona.

Hues a mostra cu Reclasering ta mostra cu G.H. a sigui diferente rehabilitacion di droga y ta sufrí di problema emocional y ta keda sufrí di esaki pasobra e no ta sigui e programanan completo. Ta kere cu guia di Reclasering



solamente ta exitoso si G.H. ta dispuesto di sigui esaki.

EXIGENCIA DI FISCAL:

Fiscal a bisa cu e caso mas importante ta esun di 27 December 2015 caminda e dama C. a worde malamente maltrata door di G.H. Fiscal a bisa Hues cu ta bisiña mester a yuda pa evita cu G.H. ta sigui maltrata e dama C. kende su cara tabatin hopi sla y wowo blaww. Cu ambulance el a worde hiba pa tratamento. Fiscal a bisa cu desde e incidente aki G.H. ta biba riba caya. E no a presenta den Corte y ta haya cu solamente castigo lo yuda. Fiscal a exigí 6 luna di prison y for di KIA lo mira si e lo kier haya ayudo. Fiscal a aproba e demanda di e victima cu ta algo mas di 1,300 Florin.

DEFENSA DI ABOGADO:

Abogado mr. Bryson a mostra cu den e raport di Polis no ta para cu tin portanan kibra. E no ta kere cu gastonan di cambio di slot lo ta aplicabel. Ademas e ta haya cu tur e asunto di

djiente ta solamente 150 Florin. E abogado ta kere cu ta solamente e asunto di djiente tin directamente di haci cu e maltrato y no e otro asuntonan. El a bisa cu e ta compronde e situacion cu e dama a pasa aden pero si mester sigui ley e ta kere cu no por demanda tur e suma.

E victima a reacciona riba loke e abogado a bisa. El a bisa Hues cu despues cu G.H. a sali for di KIA, 5 luna e no por a bay traha y su yiunan mester a experencia tur esaki. Cu wowonan yen di awa el a splica cu door di e slanan cu el a sufrí e no por a mira bon. El a sigui bisa cu ademas e sospechoso tabata molesti'e constantemente. El a bisa cu G.H. a tacha su bida priva. E no kier pa G.H. sigui molesti'e.

SENTENCIA:

Hues a bisa cu e ta sera tratamiento y a dicta sentencia di biaha. Hues a bisa cu e ta haya legalmente proba cu G.H. ta castigabel. Pa cu e castigo, el a tene cuenta cu e carchi di castigo y ta haya exigencia di Fiscal na su lugar. E ta haya cu G.H. mester sinti e malo cu el a haci y ta di spera cu e dicidi di haya ayudo. Hues a bisa cu por a scucha di e victima cuanto sufrimento el a pasa aden. Sinembargo Hues ta haya cu abogado mr. Bryson tin razon cu segun ley ta solamente gastonan directo cu e maltrato por aproba. Hues a condena G.H. na 6 luna di prison y a aproba e daño di gastonan di djiente. Hues a bisa cu ademas lo pone medida di paga daño o sea si G.H. no paga e lo bay sera.